

# Henny, Watty y Mito a logra nan meta: extradicion ta un hecho

ORANJESTAD(AAN) Ayera huez a dicta e sentencia politico pa extradita e dos prisionan Mansur pa Puerto Rico.

Un capitulo scur a cumenza den historia di Aruba y un berguenza internacional sin limite cu lo bay marca e comienzo di sacrificio politico di Arubianonan, pa asina sirbi interesnan ageno cu a uza politica di presion riba esnan cu tin manteca riba nan cabez pa asina logra extradicion discriminatorio.

Watty Vos tabata e ministro cu e boca mas grandi y e tabata esun cu a bisa cu tanto machismo y engaño politico, cu mientras cu e ta ministro di husticia na Aruba, ningun hende por worde extradita sin mas: unda Watty tabata ayera?

Vos no a bisa pueblo cu e tempo ey e mes tabata tin un KB riba su cabez pasobra su colega Henny Eman a bay di acuerdo cu Hulanda cu no tabata confia Watty, pa investiga Watty, pero el a coopera cu Henny pa asina publicamente gaña pueblo pa e ley di extradicion, cu ya nan tabata tin prepa, por a ser pasa.

Henny Eman cu tabata den e mesun tiro cu su colega Vos, tambe a para cu e mesun cara di entreguista y a gaña pueblo den dia cla, cu no por tin extradicion si no tin garantia.

Nan marioneta di prome ora, Mito Croes cu tambe ta experto pero den entreguismo di marca mayor, riba orden di su amo Henny a sinta den Consejo di Ministro di Reino pa asina bay na amen di Hulanda pa por logra extradicion.

Ministro Vos hunto cu Atacho a laga Hulanda sa cu nan no tabata haya cu e ley di extradicion mester a warda riba e derecho di Casacion y cu mester a pasa e ley o e KB numa pa asina por logra extradicion.

Kico tabata e motibo tras di actuacion di Henny, Watty y Mito?

Si nan tabata asina bon diplomatico pa manera cu nan mes a bay gaba asina tanto, cu nan mester a bay rond mundo pa drecha e bon nomber di Aruba, anto ta di con nan no por a regla e asunto di extradicion na un manera diplomatico?

Henny cu Mito por a bay

para dilanti di Cas Blanco na Washington pa manera macaco saca foto pa despues bin gaña pueblo di Aruba cu nan a ser ricibi na Cas Blanco, sin cu nan por a atende e asunto di extradicion pasobra nan no a ni ser ricibi na Cas Blanco.

Henny Eman su partido di hende drechi AVP, por a paga miyones di placa di pueblo na tur sorto di experto na Merca, pa asina supuestamente drecha nomber di pais Aruba, pero den realidad ta conseho politico partidista nan tabata paga pe y nada di drecha nomber di pais Aruba y menos regla e extradicion discriminatorio di Arubianonan.

Awe Henny Eman, Watty Vos y Mito Croes por ta satisfecho cu nan a logra pa yunan di tera worde extradita, sin cu tin bista riba cuanto tempo nan por sinta putri den prisonnan riba teritorio Mericano prome cu nan caso ser trata.

Esaki ta e garantianan cu Henny, Watty y Mito a logra pa extradicion y ayera

manera cu pueblo por a spera, ni Henny ni Watty aunke cu e ta den exterior y tambe ni Mito, no tabata disponible pa comenta riba extradicion cu entrante ayera ta nan logro mas grandi di entreguismo.

Henny Eman a declara aña pasa den su corant preferi Vocero Colonial, cu e ta kere den extradicion, pero ayera ningun hende por a haya Eman pa lage defende extradicion cu e mes tabata asina orguyoso di dje.

Hudas tambe a sconde di berguenza y temor, despues cu pa un par di moneda el a entrega Jesus pa esaki worde crucifica!

Ministro Voorhoeve di Hulanda desde ayera por ta completamente satisfecho di su marionetanan Henny Eman, Watty Vos y Mito Croes cu a cumpli cabalmente cu loke nan amo a exige di nan.

Despues cu AVP forma gobierno cu OLA, Voorhoeve por bin di bishita atrobe na Aruba pa finalmente e por bati riba schouder di e tres entreguistanan mayor di

Aruba y bisa nan cu awor extradicion a ser logra, nan por conta riba sosten total di Den Haag; "Goed gedaan jongens"!!!!

Danki na Dios cu e mayoria den pueblo ta contra extradicion y cu tin yunan di tera cu lo sigui bringa contra e inhumanidad mayor aki, cu Henny a claba manera un puñal di

traicion den lomba di cada Arubiano cu por worde extradita.

E lucha contra extradicion lo sigui pasobra keto bay e palabranan historico cu Boy Ecury a bisa prome cu e burdugonan Nazi a mate ta vigente: "Den cas di mi mayornan no tin lugar pa un traïdor".

## Pueblo di San Nicolas a bira raso riba Otmar Oduber

ORANJESTAD(AAN) Candel a dal den panchi ayera Pariba di Brug pasobra segun habitantenan, expresionnan haci di parti di Otmar Oduber pa cu e festival di Sinbad den Sportpark na San Nicolas, a pone e pueblo di San Nicolas sinti su mes humili y discrimina.

Redaccion di DIARIO a haya reaccion di habitantenan di Pariba di Brug y specialmente di e area di San Nicolas, cu a cuestiona fuertemente e hecho cu Otmar Oduber lo a laga sa via radio cu e festival di Sinbad no por tuma lugar den Joe Laveist

Sportpark pa motibonan di seguridad.

"Ta kico Otmar kiermen cu motibonan di seguridad? Cu na San Nicolas ta un gang di bandido y criminal ta biba cu turistanan cu ta bin pa e festival di Sinbad ta core peliger cu nan ta worde atraca y mata si nan bin San Nicolas?"

Esaki tabata e pregunta mayor cu San Nicolas ayera tabata exige splicacion riba dje, di Otmar Oduber.

Palabra awor ta na Otmar Oduber!

## IMITACION CRIOYO!!

